

KA UITAMISHKUMAT

Ishpashtien Nuna

Ek^u tshe atshimak Ka uitamishkumat.

Ek^u niatikut, itakanu, matsheshua, matsheshua natiku.

— Manutsheme, iteu.

— Tshui uitshimitin, itiku.

— Manutsheme anite, iteu.

Ek^u mianutshet ne matsheshu uatikut, uatikuatsheshiu. Ekuannu menuatat, minuateu tshitshue nenua utishkuema. Ek^u muk^u mitshipanna umassina katshi pitutsheti, kassinu umassina, utashama. Tshietshishepaushiniti shash tshishtanua umassina, akutenua shash. Ek^u shakuenimuiku.

— Nipa shakuenimuik^u anite e mitshetinanunit, iteu (nenu matshiniti umassina kie nenua utashama kie nenu utapish, upishakaniapim uetapet nenu tshekuannu – utamishkuma – atiku-apishinu tanite iapit nenu mitshipanna). Tshiueme, apu tshika tshi uitshimitan, iteu.

Ek^u tshauet ne.

Ek^u minuat niatikut atikua.

— Manutsheme, iteu.

Ek^u mianutshet. Uapitsheushkamikunu nutim uitsh eukuan eshinakuannit.
Ek^u apu minuatat iapit, nenu eka kiashuniti.
Ekuannu nenu apu minuatat. « Nipa shakuenimuik^u, itenimeu,
anite e mitshetinanunit. »
— Tshiueme, iteu, apu tshi uitshimitan.
Ek^u tshauet ne minuat. Ekuannu nish^u.

Ek^u minuat niatikut kakua, kakua ekuannu niatikut.
— Tshui uitshimitin, itiku.
— Eshe, iteu, uitshimi, manutsheme.
Ek^u mianutshet, uashatueu. Mishta-minuashinu uitsh, nutim uashatuetau.
Ek^u muk^u anite ua nipataui, tshipatauieu mani. Tshipatauieu anite ua nipataui
tanite uipemeu nenua utishkuema.
Ek^u mauat, apu minuatat.
— Tshiueme, iteu, mauat, apu tshi uitshimitan.
Eukua !

Ek^u minuat uishkatshana niatikut.
— Tshui uitshimitin, itiku.
— Manutsheme utin, iteu.
Ek^u mianutshet, minapakuna itakanu, minapakuneu, ekuannua
mianutshet. Ekue utitat. Ek^u nenu uetinaniti, nipaieu amishkua
(utapeu tanite amishkua). Ek^u uetinapet ne uishkatshan,
uetshipitak nenu pishakaniapinu, ekute nianatuakateuit itakanu.
Ek^u pepashtapitamuat ushkatinua, titipapitamueu.
— Mauat, iteu, apu tshi uitshimitan. Tshiueme.

Ekuannu ma uet ishinakuanniti uishkatshan ushkata nenua, miam pepashtapitenitaui ka-ishinakuannuani. Ekuana !

Ekuannu kuishk^u tshe natikut, ekuannua ka ui uitshimat. Ekuannua niatikut.

— Tshui uitshimitin, itiku.

— Eshe, iteu.

Ekuannua ka ui uitshimat. Ek^u uatshimat, eitaht ma anite.

— Tshin ma ute ta etaian, iteu.

— Tshika mueshtatshikun shuk^u ua uitshimin, itiku. Pemipitshiakui, shipiss at shuk^u eka tshika katshinakuan, iapit tshika pimitashkunau pushtinau. Iapit tshika tshipashkunau, shipiss iashukamepitshiakui.

Ek^u uetakussinit pemipitshit. Ek^u apu katshessitutak shipissinu, shash utakussinu. Ekuannu apu tshipashkunat mishtikua. Ek^u mianutshet nete etat. Nete shash tshishtau nenu uitsh. Ek^u apu taniti utishkuema. Ek^u tshauet itakanu. Shash tshishtau nenu uitsh tshauet. Tshekennua nenua, shash mushepeianu, auennua pepami-akutshinniti utishkuema !

— Ka ititan, itiku, tshika mueshtatshikun shuk^u ka ui uitshimin. Tshin ma ute ta etaian ek^u.

— Nipa tshi a tshi tan ? iteu. Nipa shikatapauen.

— Mate pet uepin tshitashish, itiku.

Ekue uepinamuat utashtisha. Ekue kutshiunani tapue, nishtuau kutshiunenua. Ekue uepinamakut. Ekue tatshinat nenua utashtisha, nasht apu nipiushiniti.

— Eku eshpa enuet, iteu.

— Eku manna tshimatshunishima, itiku.

Ek^u mennak umatshunishima.

— Miam at tshiuekamuiani, ek^u tshe pet mushaukashin, itiku.

Ekue tshiuekamuniti, ekue mushaukashit, shash atimi-akutshinnua utishkuema. Ekue nuauat at. Nete taukamish etaniti ekute uet kutshiniti, ekue kutshit kie uin. Miam mitshuap eukuan etenitak, nasht apu tatshenitak. Etaht ma anite.

Iteu nenua utishkuema (utauassimu tanite, tanua utauassimishuaua) :

— Tanite ma tshipa itishimunan ? Ka-peikushua ute etaiak^u muk^u, ume tshitshinan.

Ekuannu ma uet uatit itakanu amishk^u, nete eitakuanniti nenua. Apu peikushinit nenu muk^u uisht. Eukuan ne katshi uitamishkumat itakanu, ekuannu nenu uet tutak.

Ekue tatutahk nete uatuaua eshpish papamipaniht.

— Ek^u ma nutshikakuiakui, iteu, pikueikaniti at ume etaiak^u tshitshinan, eukuan neme tshe itishimuiak^u.

Ek^u etaht ma anite. Ekuannu nanitam nutshikuakanu ne, tshissenimakanu anite etat. Nanitam nenua nutshikueuat innuat.

Apu tshi nipaiakanit nita, tanite at tshepauakaniti ne, tatshishkam^u nenua tshishtakanashkua anite eshikapauniti. Apu tshi nipaiakanit, at mitshetuat anitshenat enutshikuah mani.

Ek^u peuatikut ushtesha, ushtesha peuatikut.

— Nipa tshi tutuau nin, itiku.

Ek^u eieshkaytikut ushtesha, ushtesha itakanu eieshkaytikut.

Eitaht kassinu ekue meshtaiminiti uata, ek^u uin anite tshepaikannit uisht. Ek^u tshatapatak nenua tshemataniti ushtesha utshishtakanashkunua, neka ite assit kie neka ite ishpimit (apu uapatak niate eshpishinakuanniti, eshkuashkuanniti).

— Ma, tshe nipaikuiak^u ! iteu utishkuema.

Tashtakashinamuat tanite shash tshi tshipaikanu ne uisht.

— Matshik^u ! iteu utauassima.

Ekue unuipanniti utauassima, metueuakannuti ! Kassinu katshi unuipanniti, minuat utishkuema mashten, metueuakannuti ! Ekue pikuaikanit ne uisht.

— Eitune mak au, itiku ushtesha, ka ui uitshimikauin mani. Etshe ma ka ut eka ui nipauin mani.

Ekue minikut umatshunishiminua, umatshunishima manikut. Ek^u uatshimat. Metat tshashuashhpishut, tshuetatshimakanu, apu tshi pimutet tanite. Etat ma anite.

Uitamueu ushtesha :

— Peikumishkush ishkuemishk^u, eka nita tshika minnau umushkamim. Ek^u shaueniht. Peikumishkush nipaiakanu, shash mitshetupipunnu tanite. « Apu tshika tshi tshissenimat », itenimeu nenua ushima. Shash anite tshi itiku, shashish anite itikupan. Peikuan ekue ashtuakanit nenu mushkaminu ne, kie nenu uiashamishkunu.

Ekue minit nenu mushkaminu ne tekushinit uetakussinit.

Ekute uet tshitshikaut inanu shuakan-nipi anite utshipishkuamit, niate
utaipanit at. Ekue nitatshuak anite inanu paushtik^u, natuaiashiu, uauakashkueiau.
Ekue initepeianit, shash
at uitaumetak utishkuema, itakanu.

Eukuan eshkuapetshishit.

